


regnum de Corck, excepta civitate & Oustmanorum Cantredo, tenendum ipsis & heredibus de me, & Ioanne filio meo per servitium sexaginta Militum. Et ab illius Filii-Stephani hærede genus recta serie ducit Georgius Carew nunc Baro Carew de Clopton, qui non ita pridem Momonia Præses, & mihi, quod agnosco, in nonnullis Hibernicis lubens præluxit.

COMITATUS WATERFORD.



AD plagam Orientalem inter flumina Broodwater ab Occasu, Suirum ab Ortu, Oceanum ab Austro, & Comitatum Tiperariensem ad Septentrionem panditur Comitatus Waterfordiensis, sua amœnitate & fecunditate regio sane læta. Ad Broodwater ubi primum Corcagienfes reliquerit, Lismor cernitur Episcopali sede nota, cui olim præfuit Christianus Episcopus, & Hiberniæ Legatus circa annum CIO CXLVIII, de Ecclesia Hibernica optime meritis, in iisdem claustris cum S. Bernardo & Eugenio Papa Clarevalli juvenis educatus. Nunc vero ex quo possessiones pleræque omnes abalienatæ, Waterfordensi Episcopatu adunatur. Prope vero ostium Ardmor est viculus, de quo & hoc flumine olim Nechamus.

Urbem Lissimor pertransit flumen Avenmor, Ardmor cernit ubi concitus aquor adit.

Dessee. Dessee territorium adjunctum dicitur, cuius Dominus è familia Desmonia Vicecomitis Dessee titulum honorarium nostra memoria accepit, sed cum prolem non progenuerit masculam, una cum illo brevi intercidit. Haud procul Dungarvan castro satis munitum & statione satis commodum mari apponitur, quod cum ejusdem Baronie Ioanni Talbot Comiti Salopiæ Rex Henricus Sextus munifice concessit, sed postea cum opportune situm ad illam Momonia partem in ordinem redigendam videretur, imperiali Coronæ Regum Angliæ in perpetuum Parlamentaria autoritate fuit annexum. Poerii antiquæ nobilitatis ab ipsa Hibernia per Anglos debellata juxta floruerunt titulo Baronis de Curraghmore honorati. Verum ad Suiri ripam Waterfordia prima & præcipua hujus Comitatus civitas conspicitur. De qua Nechamus,

Suiri in signem gaudet ditare Waterford, Equoreis undis associatur ibi.

Hæc urbs Portblargy Hibernis & Britannis, Waterford Anglis appellata, à Norwegis Piratis constructa, quamvis cœlo sit crassiusculo, solo minus læto, & angustioribus coarctata vicis; ea tamen portus est opportunitas, ut opulentia & frequentia secundas in Hibernia ferat, fide & obsequio in imperium Anglicum semper singulari. Ex quo enim Richardus Comes

Penbrochiæ expugnavit, Anglis Hiberniam subigentibus tutam fide sua, & quiete, securamque à tergo pacem semper præstitit. Vnde Reges Angliæ plurimas, & maximas immunitates concesserunt, quas Henricus Septimus auxit & confirmavit, eo quod contra ementitum illum principem Perkinum Warbeck qui ultimæ fortis juvenis plenis impudentiæ velis ad summum regiæ dignitatis gradum enitebatur, dum personam Richardi Ducis Eboracensis filii Edwardi Quarti natu minoris indueret, cives fortissime prudentissimeque se gessissent.

Hunc Comitatum Waterfordia una cum civitate dedit Rex Henricus Sextus Ioanni Talbot Comiti Salopiæ, quem modo dixi, his verbis, quæ cum viri illius bellicosissimi virtutem testentur, ut virtuti suæ constet honos, ex Regiis Archivis apponere operæ pretium mihi videtur (fortasse etiam & cuiusdam alteri videatur) Nos igitur (inquit Rex post alia, scribarum ejus ævi eloquentia cum Latinitas laboraret) strenuam probitatem charissimi & fidelis consanguinei nostri Ioannis Comitis Salopiæ & de Weysford, ac Domini de Talbot de Furnivall & Le Strange usque ad sui senium in guerris prædictis in corpore non minus sudoroso, quam etiam multotiens sanguinis effusione rubricato satis expertam debita consideratione pensantes, intendentesque qualiter Comitatus & Civitas nostri Waterford in terra nostra Hibernia, Castrum, Dominium, Honor, terra & Baronie de Dungarvan ac omnia Dominia, terra, Honores & Baronie, cum pertinentiis infra eundem Comitatum quæ per rebellium foris facturam, reversionem, seu decessum alicujus personæ sive aliquarum personarum, Escaetam, aut aliquem alium juris titulum ad manus nostras, seu progenitorum nostrorum devenire, seu in eisdem esse debent: per hostiles inimicorum & rebellium nostrorum invasiones in partibus illis adeo sunt desolata & guerrarum spoliis in tantum subjacent, quasi totaliter devastata, quod nobis non ad proficuum sed ad perditum redundarunt sapius & redundant; pro eo quoque quod per eundem consanguineum nostrum prædicta terra nostra Hibernia in partibus illis contra hujusmodi inimicorum & rebellium nostrorum insultus potentius defendatur, ipsum in Comitatem Waterford una cum stilo, & titulo, & nomine, & honore eidem debitis ordinamus, præfecimus, & creamus. Et quia crescente status celsitudine necessario crescunt & omnia, de gratia nostra speciali & certa scientia & mero motu nostris, & pro statu ipsius Comitis consanguinei nostri modo decentius manutenendo dedimus, concessimus, & his literis nostris confirmavimus eidem Comiti Comitatum prædictum una cum prædictis stilo, titulo, nomine, & honore Comitis Waterford, ac prædictam civitatem cum feodi firma ejusdem Castra, dominia, Honores, terras & Baronias cum pertinentiis infra Comitatum illum, nec non omnia & omnimoda maneria, hundreda, wapentagia, &c. per totam maris Costeram à villa Yoghall usque prædictam Civitatem Waterford. Habenda & tenenda, prædictum Comitatum Waterford, stilum, titulum, nomen & honorem Comitis Waterford, ac prædictam civitatem

Comes
Waterfordia.

Water-

Lismor.
Christianus
Episcopus.

Ardmor.

Dessee.

Dungarvan.

Poerii Barones de
Curraghmore.
Waterford.